

痛史

第十六種

鹿樵紀聞



中華民國元年六月初版



翻印
必究

(痛史國變難臣鈔一冊) 附錄三種
第二十種

(每冊定價大洋壹角)

校訂者
印行者

商務印書館

印刷所

上海、北河南路北首寶山路
商務印書館

總發行所

上海四馬路中市
商務印書館

鹿樵紀聞卷中

唐王

明唐王聿鍵。小字長壽。太祖九世孫也。喜讀書。好任俠。襲爵後。坐殺兩叔以復父仇。廢錮鳳陽。弘光僭號。赦出。金陵破。隨鄭鴻逵入閩。撫臣張肯堂。按臣吳春枝等。與鄭氏擁而立之。以乙酉六月望日僭號。改元隆武。封弟聿鏞爲唐王。鄭芝龍。鄭鴻逵。皆進爵爲侯。方行郊天禮。大風忽起。天帝高皇前燭滅。尙寶卿馬驚仆。玉璽墜地。識者知其不終。以張肯堂。吳春枝。李長倩。曹學佺等。爲六部尙書。召黃道周。蔣德璟。與蘇觀生。同入閣辦事。當是時。文武濟濟。若可有爲。然地狹民貧。政由鄭氏。嘗宴大臣。芝龍與黃道周爭席。唐王卒右道周。又所薦引。不能盡用。芝龍由是不悅。而鄭氏亦自以暴斂失民。使王兆熊主餉。沿門搜括。不輸者。榜其門曰不義。又大鬻官爵。部司價

止百金。於是娼優僕隸。盡列衣冠。拜謁州縣。鞭撻鄉里。遠近延頸王師。有清行如蟹之謠。八月。曾妃自浙迎至。大營宮殿。開織造府。曾氏下體之服。皆織龍鳳。卮匱之屬。悉用黃金。是月。靖江王亨嘉於廣西僭號。丁魁楚破之梧州。執送福建。斬於市。九月。黃道周憤鄭氏偷安。聞江西紳士傅鼎銓、萬元吉、楊廷麟等。所在團結爲明守。自請視師。芝龍不與一兵。道周出關。召募得千餘人。行至衢州。爲其門人所誘。執送江寧。死之。十月。唐王使蘇觀生代道周督師江右。旣而鄭芝龍自念若不出關。終無以壓衆心。乃下令分遣鄭鴻逵援浙西。鄭彩救江右。聲言兩路各萬人。實不滿千。臘月。唐王命築壇行推轂禮。李長倩以餉不繼。憂憤而死。丙戌正月。唐王如建寧。將西出。芝龍固請還省。乃回駐劍津。馬士英叩關求見。王命守關兵勿納。闖賊爲土兵所殺。其衆降於楚。撫何騰蛟。兵勢驟張。上疏請唐王入楚。蘇觀生至贛州。值萬元吉敗於吉安。卽棄贛州奔南安。元吉入贛固守。王師攻之。不能克。永寧王誘大帽山洞蠻同保撫州。王師圍之。永寧求救於鄭彩。州監軍張家玉以三營先進。王師大集。彩望風而

遁。家玉兵潰。撫州破。永寧王死之。鄭鴻逵駐關外。聞報亦遁歸。蔣德璟自行出關。見瘦兵弱卒。一無可恃。知事不可爲。卽告病去。六月。補行乙酉鄉試。王子誕生。大赦。覃恩。各官上表稱賀。有日月爲明。止戈爲武之語。唐王大加嗟賞。又以國家元氣之削。由於靖難。乃復建文年號。建方孝孺祠。鑄姚廣孝鐵像。跪於階前。是時王師已破。浙西。進取仙霞。洪內院以王爵啖芝龍。芝龍心動。乃託言海寇狎至。悉撤關內外兵。唐王始決計西行。就何騰蛟。七月。王師至關。守關吏搜得閩中迎降書二百餘封。唐王命焚之。諭臣下改心易慮。八月。貝勒克仙霞關。唐王西走。猶以書數十扛自隨。追兵迫。始騎而馳。將至汀州。因曝龍鳳衣。停一日。方入城。忽有叩門稱扈蹕者。啟視之。則北騎也。遂與曾妃同被執。死於福州。或曰唐王至邵武。知事不可爲。有二宮人縊死。取三棺釘之以出。其一。則曾妃也。唐王易服潛遁。後至瓊州。爲僧於五指山。後鄭成功在鼓浪嶼。曾有使存問諸遺臣。然莫必其眞僞也。福汀旣破。王弟聿錫浮海走羊城。時江右盡陷。蘇觀生亦棄贛入廣。聞桂王稱監國於肇慶。卽遣使勸進。然自以與

丁魁楚素不相能。不樂西附。適聿鏞至。乃與何吾騶、顧元鏡、王應華等復奉之稱帝。改元紹武。以都司署爲行宮。卽日封觀生建明伯。與元鏡、應華並東閣大學士。時倉卒舉事。通國奔走。夜中如晝。不旬日。除官數千。冠服皆假之優伶云。永明旣立。遣彭耀及陳嘉謨諭觀生。怒其不遜。執而斬之。於是治兵相攻。以番禺人陳泰際督師。與永明王將林佳鼎戰於三水。大敗。復招海盜數萬人。以林察爲大將。戰於海口。斬佳鼎。觀生意得。務粉飾爲太平事。而專任關捷先、梁朝鍾爲心腹。捷先由進士歷官監司。小有才。使司筆札。朝鍾舉於鄉。善談論。兩人首倡。兄終弟及之議者也。有楊明競者。潮州人。好爲大言。詭稱精兵滿潮惠間。可十萬。卽特授潮惠巡撫。朝鍾語人。內有捷先。外有明競。強敵不足平矣。又有梁鑿者。妄人也。觀生才之用。爲吏科都給事中。與明競大納賄賂。觀生又多招海盜。其衆白日殺人。懸肺腸於貴官之門。以示威。人情大擾。李成棟覘知之。卽啟貝勒發兵而西。比入廣。潮惠二府先迎降。成棟卽用其印移文廣州報無警。而使林永茂以選騎三百隨其後。臘月望日。聿鏞方與觀生視

學。永茂以十八騎先至。詐稱花山降盜。突入門。揮刀大呼。時精兵皆西出。倉卒不能集。城中一時奔潰。觀生走。鑿所問計。鑿曰。惟死耳。復何言。觀生入東房。鑿入西房。各拒戶自縊。觀生慮其詐。稍留聽之。鑿故扼其吭。氣湧有聲。且推几仆地。久之寂然。觀生信爲死。遂自縊。明日。鑿獻其屍出降。聿鑄方閱射。急易服。踰垣而走。追兵執之。成棟使饋之食。聿鑄嘆曰。我若飲汝一勺水。何以見高帝。乃自縊。吾騶應華等悉降。惟朝鍾亦自縊死。

魯王

明魯王以海。太祖十世孫也。申酉間。南北喪亂。以海避地台州。會餘姚新令發閩左治道。執扑以扶行役者。而扶其不力者。役者怨。奪其扑以扶新令。殺之。里中少年。輟耕而應者數千人。於是諸生鄭遵謙出從之。殺招撫使於江上。浙東震動。張國維、陳函輝、熊汝霖、錢肅樂、諸紳先後起兵。與遵謙迎魯王至紹興。稱監國。推國維爲大學士。督師江上。召逃將方國安、王之仁、相與分地畫江而守。時乙酉六月也。其年十月。

國安自金華至。列柵錢塘江西岸。右倚江左桐君山爲却月形。王師攻之。不能克。已而乘風發礮。風迴礮裂。士卒披靡。王師乘之。國安不能拒。奪舟東遁。丙戌三月。王師決壩入河。王之仁以舟師迎戰。却之。當是時。戰雖倖勝。而文武乖違。人無固志。蓋起事之初。諸人皆書生。不知兵。迎方王二帥。拱手授之。凡原設額兵。俱歸二營。而烏合之衆。則自領焉。旣而二帥欲自專。反忌諸人侵其柄。漸生異同。始議分餉。浙東錢糧六十餘萬。悉給兩營。而義兵或散或留。留者聽其自行徵勸。由是公私有弊。又閩中遣使犒師。方國安怨唐王先殺浙使陳謙。輒收斬之。魯王恐閩中來討。定議抽兵。使張國維西出。別遣余煌視師江上。故人心益渙。是歲大旱。錢塘江水涸沙壅。浙撫張公存仁偶見浴於江者。或徒步往來。馳騎試之。水淺不及馬腹。乃麾兵竟渡。時方國安猶有衆數萬。其精兵曰磨盤營。將出拒戰。阮大鍼在方營。私謂磨盤營兵曰。若聞將軍令乎。欲令汝曹共殺妻子以決死戰。營兵聞之。懼而先走。衆遂大潰。紹興破。張國維赴水死。大鍼說國安欲執魯王北降。使人守之。魯王伺間脫走。與鄭遵謙、熊汝

霖隨石浦守將張名振出海。投舟山。陳函輝走雲峯山中。作絕命詩云。生爲大明之人。死爲大明之鬼。笑指白雲深處。蕭然一無所累。又云。斬盡一生情種。獨留性地靈光。古衲共參文佛。麻衣泣拜高皇。從容笑語。自縊而死。魯王之投舟山也。黃斌卿不納。名振送之福甯。依鄭彩。芝龍北降。彩與魯王避之長垣。順治戊子。彩兵因小憤。縛鄭遵謙。熊汝霖。投之江。至己丑歲。閩地悉定。彩亦棄魯王去。明年正月。張名振復得舟山。迎魯王居之。舟山破。魯王隨名振奔廈門。又別居澎湖島。鄭成功月饋銀米。遇節上啟。後漸疏慢。壬寅夏。成功病死。其年冬。魯王亦卒。

鄭成功之亂

天啟甲子。福建鷺門僧貫一。掘地得古磚。背印兩圓花突起。面刻隸字四行云。草雞夜鳴。長耳大尾。千頭銜鼠。拍水而起。殺人如麻。血成海水。生女滅雞。十億相倚。起年滅年。六甲更始。庚小熙皞。太平八紀。是時鄭芝龍初入海爲羣盜也。芝龍字飛黃。泉州南安縣石井人。其父紹祖爲府吏。府之後有荔枝樹。飛黃幼時。嘗與弟自牆外以

石子打荔枝。誤中太守。太守擒治之。見其姿容秀異。笑曰。法當封侯。卽釋去。旣長。益嫵媚。音律樛蒲。靡不精好。因烝後母。爲父所逐。有巨商攜往海外。初至日本。爲人縫紉以餬口。一日積餘貲三錢。偶遺於道。行求之不得而泣。適有倭婦新寡。乃長崎王族女也。夜感異夢。偶見芝龍。問得其故。悅其貌而私之。贈以金寶。芝龍始得自通於長崎王。王復愛之。遂以婦妻焉。生子森。久之仍附巨商歸。中途爲盜所劫。盜魁顏振泉復愛之。任爲頭目。振泉死。衆議所立。莫能決。乃插劍於斛米中。祝曰。拜而劍動者。天所命也。次至芝龍。劍忽躍出。衆皆異之。遂推爲魁。崇禎元年。受撫於熊文燦。授參將。八年。以弟芝豹小字芝彪後改名皆驍勇善戰。旣破劉香老。陞總兵。兄弟遂雄據海上。福藩立。封芝龍爲靖海伯。後與蘇觀生、張肯堂等擁立唐王。進爵爲侯。其子森。日本甥也。初入南安縣學。考劣等。乃至江寧入太學。執贄於錢謙益。謙益字之曰大木。唐藩僭號。見而奇之。始賜國姓。名成功。順治丙戌。王師破福州。芝龍退保漳泉。洪內院啖以玉爵。芝龍撤備約降。成功屢諫不聽。密啓王曰。臣父臣叔。皆懷叵測。陛下

宜自爲計。王曰：若能從我行乎？成功對曰：臣從陛下，亦何能爲？當捐軀別圖，以報陛下耳。已而王師挾芝龍北，又侵辱其婦女，日本女自縊而死。成功由是怨恨，用夷法剖母腹，出腸穢而後殮。其年冬，遂據南澳，舉兵反。南澳者，屬香山縣，大海中突起石埂，廣十餘丈，長六七里，相屬不斷如蓮莖。中途有關，逾關而前，一洲寬衍如蓮的。成功據爲巢穴，而設演武場於廈門。往來攻劫海上諸城邑，官兵不能制。其部下分南郎、北郎、南郎、多聞、廣海盜。芝龍舊部曲，北郎則江浙人，及所招中原劇盜，旗下逃丁也。朝廷患其剽勁，又念芝龍已先投誠，許割漳泉惠潮四府封之，令島中薙髮。成功謝曰：大邦若存此彈丸，以延有明一綫，請從安南朝鮮之例，不廢職貢。若不以爲然，則亦惟命是聽。壬辰五月，成功圍漳州，城中食盡，死者數十萬，其存者氣息僅屬。雖悲哭不能下一淚。至十月，金固山救至，始撤圍退。至海澄，癸巳夏，固山就攻之。海澄城壞，成功親當矢石，督衆力戰。王師失利而退。固山益調兵復進，薄之。成功聞城外空礮遞發，知兵將至，使鐵人持巨斧臨濠嚴立，令曰：敵至方斫。鐵人者，皆偉軀多力。

之士。周身被鐵。畫以朱碧彪文。用置行首。遏敵鋒者也。官軍渡濠。鐵人迎而斫之。隨斫隨落。濠爲之滿。卒不能進。於是再申前命。成功仍請比安南朝鮮。朝廷知終不可撫。乃徙芝龍於山東。其年冬。李定國寇擾廣中。成功乘間襲破漳泉。丙申秋。復犯連江。守兵屢挫。至戊戌歲。大舉入寇。留黃某守廈門。餘俱從行。甲士十七萬。習流五萬。鐵人八千。習馬五千。戈船八千。進至陽山。值暴風。漂沒數千人。引還廈門。己亥夏。復出至崇明。以張煌言爲先鋒。溯長江。抵焦山。先奪譚家洲。時王師於金焦間用鐵索橫江。號滾江龍。成功使張亮先斷之。據瓜洲上游。而自率大隊薄城。守兵方拒戰。而張亮自上流至。習流將周全斌。率銳卒帶甲銜刀浮江而渡。腹背夾攻。守兵不能支。瓜洲陷。成功留其將劉獻守之。而移師京口。據銀山結陣。官兵爭山。成功麾衆疾鬪。乘高發礮。多鼓均聲。江水震沸。官兵復敗。守將高謙以城降。旣得京口。甘輝進計曰。南都完固。不可驟攻。今據瓜洲。則山東之師不下。守北固。則兩浙之路不通。扼蕪湖。而江楚之援不至。且分兵定其屬縣。手足旣斷。腹心自潰。此長策也。成功不聽。留周

全斌守京口。而悉師薄金陵。從儀鳳門登陸。營於岳廟山。使黃安以水師扼三汊淺口。成功兵雖銳。然素少紀律。又屢勝而驕。見官兵不出。有輕敵心。軍士皆漁獵飲博爲樂。樵蘇四散。無復部伍。崇明守將梁化鳳。以騎兵三千自內路至。覘其無備。襲破前屯。余新營。擒甘輝。中軍方欲移屯。而城中精騎直衝其背。成功大敗。收兵走三汊河口。揚帆而遁。其年。朝廷命將軍達素。及總督李率泰。分道致討。達素出漳州。猝與寇遇。時寇衆方於海中下碇。不意其至。官兵乘風利直進攻之。斬其將周瑞。陳堯英等。俄而風轉。波濤山立。北人皆眩暈顛仆。成功手自起旗。督兵再戰。官兵大敗。而李總督出同安。進至高碇。亦失利而還。事聞。朝廷始誅芝龍。鄭氏在北者。無少長皆棄市。臺灣者。在大海中。地形如彎弓。北高南下。周袤幾三千餘里。東倚山。西薄海。中爲臺灣市。一望平原者六十里。遠峯聳翠。嘉樹翳茂。由高而北。至淡水洋。雞籠城與福州相近。其東則大琉球也。由下而南。至加浴堂。郎橋。其西則小琉球也。灣之外復有沙隄。名曰昆身。自大昆身至七昆身止。起伏相生。環抱如龍。又有大仙頭海。翳窟。

皆臺灣外障也。北線尾鹿耳門。則臺灣門戶也。澎湖島在臺灣西北。共三十六嶼。惟西嶼頭最高。餘皆平坦。自廈門至澎湖。有水黛色。深不可測。舟行甚險。春夏由鎮海圻放洋。秋冬由寮經或圍頭放洋。風便。一晝夜俱可望見澎湖。由澎湖東南行。水淺。必易舟而進。一日可抵鹿耳門。其地土曠人稀。素爲盜賊出沒之所。崇禎中閩地大旱。芝龍招集流民。傾家資。市耕牛粟麥分給之。載往臺灣。令墾闢荒土。而收其賦。鄭氏以此富强。及芝龍北降。臺灣爲紅夷所據。築城三。曰臺灣。曰淡水。曰雞籠。又於大崑身海旁。相對築赤嵌平東二城。皆石壘火燬。融結如天城。成功在南濠雖倖勝。自知形勢單弱。謀遠徙。適舊部曲有自紅夷至者。說之曰。臺灣君家故土。今紅夷易制。若得臺灣。則不憂無餉矣。成功然之。辛丑三月。成功兵至澎湖。遇水漲。竟以海船入鹿耳門。城中夷人不過千。餘皆鄭氏口所遷民。語成功移其水原。數日。夷人大困。乞和。成功與盟而縱之去。遂復居臺灣。其年夏。成功病死。面目皆爪破。曰吾無顏見先皇帝也。子名經。代統其衆。甲寅春。耿精忠叛。遣使招經。經悉兵入寇。既至。精忠欲加

節制。經怒。反與相攻。互有勝負。及耿氏亡。經盜有潮、惠、漳、泉、韶、邵、汀、興、八府。王師以次克復。至康熙十八年。經始遁歸臺灣。其年經立其庶子克欽。號曰監國。而退閒於洲子尾。築遊觀之所。縱聲色以自娛。二十年辛酉。經病死。其衆憚欽之嚴。迫令自殺。而推經嫡子克塽爲主。克塽尙幼。不能統衆。癸亥六月。浙閩總督及提督施琅會師出海。十四日。大兵由銅山開洋入八罩。十六日。與劉國軒大戰於澎湖。不能克。十八日。破虎井桶盤嶼。二十二日。分兵進剿。左師向雞籠山。右師入牛心灣。中軍分爲八陣。每陣三疊。自辰至申。盡銳夾攻。賊衆死傷無算。遂克澎湖。劉國軒遁歸臺灣。與馮錫藩、邱磊、何詒等。挾鄭克塽稽首歸命。明宗室隨之來降者口人。皆安插河南山東墾荒。惟術桂一門八口。卽日自縊。臺灣始入版圖。設分巡道一員。領府一縣四。附郭曰臺灣縣。居中。南爲鳳山縣。自臺灣至沙碼碯止。外皆土番。負固罕至城市。北爲諸羅縣。自臺灣至雞籠城止。過此。人跡罕到矣。又彰化縣未詳。克塽至京師。授漢軍公。鄭氏自天啓甲子爲盜。傳四世。至康熙甲子而滅。果符六甲更始之讖。

張煌言殉節始末

張煌言字元箸。別號蒼水。崇禎壬午舉人。與錢肅樂起事寧波者也。紹興既破。煌言收餘衆竄海上。往來舟山廈門間。順治己亥。鄭成功內犯。以煌言爲前鋒。其自序略云。余自乙酉倡義。距今十五年。棲山踏海。艱苦備嘗。其間三入長江。登金山。掠瓜洲。儀徵。師徒單弱。迄無成績。今歲仲夏。鄭延平全師北出。以余熟江上形勢。推督前部。時敵於金焦間橫鐵索絕流。夾岸列西洋大礮。守禦甚嚴。余引舟入江。乘風溯流而進。方過焦山。風急甚。急叱舟人斷索鼓棹。兩岸礮轟如雷。彈飛若電。同艚百艘。得至金山者。十七舟而已。翼日。延平克瓜洲。將濟師鐵甕。余請獨率標下直搗觀音門。以制留都之援。將至儀徵。吏民賣版圖來迎。鷁首所過。一二遺老皆具瓣香相送。次進六合。得報。知潤州已下。余意延平由陸逐北。不三日當達石頭。不料仍由水道。海船行遲。余抵觀音門。再越宿。見陸信杳然。乃移泊江浦。發輕舟。先上蕪湖。比延平至。達七里灘洲。方與余商略攻建業。而上流捷音至矣。延平以蕪湖咽喉之地。屬余統本

轄戈船往赴。臨發。余謂延平師久易生他變。宜乘朝氣。分兵襲取旁郡邑。使金陵爲孤注。然後以全力搏之。不可先挫銳於堅城之下。延平唯唯。七夕。余至蕪湖。傳檄郡邑。致書縉紳。大江南北來歸者數十城。四方豪雄。往往詣軍門受約束。請歸禡旗相應。旣降寧國。方謀直取九江。不料延平忽棄余言。不急進攻。又師無紀律。敵人攻瑕。竟至大敗。余旣得報。猶口師卽偶挫。未必遽登舟。卽登舟。未必遽揚帆。故且退治蕪湖。彈壓上流。更不料延平膽怯。并瓜潤棄之而走矣。余時進退維谷。不得已西趨鄱陽。欲號召九江義勇。爲再舉計。奈人心已散。師潰銅陵。棄舟登陸。追兵至。突圍得出。顧視左右。止一僮自隨焉。其自敘如此。煌言旣脫。易服變名。自英霍山中遁入天台。間關百折。得還海壖。樹蠹鳴角。舊衆稍集。聞鄭氏新得臺灣。兵勢復振。遣客羅子慕說之出師。成功不應。未幾。成功死。煌言益無所向。乃散遣其衆。海中有島名懸嶼。荒僻無居人。其陽多汊港。其陰皆峭壁。煌言與親信數十人結茅其下。而風帆浪楫。出沒台寧間。莫有知其處者。又畜雙猿以候動靜。舟未至二十里。卽猿鳴木杪。後因乏

食。遣人至普陀告糴。蹤跡始露。舊校某利賞。以夜半從山後懸籐踰嶺而入。執歸寧波。乃賦絕命詩曰。海甸縱橫二十年。孤臣心事竟茫然。桐江只繫嚴光釣。震澤難迴范蠡船。生比鴻毛猶負國。死留碧血欲支天。魯戈莫挽將頽日。敢望千秋青史傳。又甬東道上詩云。國亡家破欲何之。西子湖頭有我師。日月雙懸于氏墓。乾坤半壁岳家祠。慚將赤手分三席。特爲丹心借一枝。他日素車來浙路。怒濤豈必是鷗夷。後戮於杭州。埋骨於南屏之陰。

舟山始末

舟山東西七十里。南北倍之。西去蛟門二百六十里。東距普陀四十里。黛山屏其南。桃花劍列其北。卽傳所傳甬句東也。宋以前曰滄洲。元爲昌國縣。明初併入寧波之定海。崇禎間。閩人黃虎癡斌卿嘗爲其地參將。後陞去。乙酉夏。斌卿自江上逃歸。上書唐藩。言舟山民俗淳朴。通商舶。饒魚鹽。西連越郡。北溯長江。此進取之地。唐藩然之。賜劍印。率麾下至舟山。舟山之寇自此始。張名振者。石浦守將也。與斌卿爲兒女。

姻。紹興之破。與魯王投舟山。斌卿不欲奉王。故隨鄭彩入閩。而名振獨留。其年冬。潰將張國柱來犯。斌卿連戰不能禦。名振使其將阮進以數舟衝國柱營。因風水之勢。發礮擊之。國柱敗去。進故海盜。精水戰。爲名振心腹。旣破國柱。斌卿以計籠絡使去。張而歸己。名振由是不悅。未幾。而有提督吳勝兆諸生華夏之事。勝兆鎮松江。以濫撫太湖白黨被參。遂懷異志。以蠟書求援海上。斌卿不許。名振獨以兵就約。勝兆所撫之白黨。恃主帥之有謀也。反凌官軍。官軍恨之刺骨。其未撫者。亦無復畏忌。及官兵擒解。則勝兆欲示無他心。又輒梟示。亂民疑主帥意中變。乃先期劫勝兆。夜召推官方。同知楊議事。縛而殺之。下令解辦。而名振兵至白沙。因洗礮驚動龍宮。風濤大作。名振舟壞落水。餘衆踉蹌遁歸。官兵旣恨亂民。又不見海上動靜。視亂魁陸炯戴之俊等皆易與。於是副將唐世勳設計誘斬炯等。而執勝兆。朝廷窮治其獄。吳中失職之士多死焉。華夏者。甯波諸生。與其儕五人同謀舉兵。遣人走舟山。約斌卿。斌卿諾之。夏等又約四明。疑有文口謀洩。就戮。斌卿本無大志。特爲利而動。兵至甯波。泊舟

桃花渡。望城上毫無變動。已知夏等事敗。官軍開礮擊之。卽揚帆而遁。名振之覆舟白沙也。與張煌言共浮一篷。得抵岸。投一小菴。僧一泓爲剪髮易服。始得脫歸。從此斌卿每事侮之。名振於是別屯南田。斌卿子名振堦也。自閩歸。便道過南田。名振留飲十日。而舟山訛傳南田劫舟殺公子。斌卿信之。遽抄名振家。已而公子備述婦翁情至。斌卿慚悔無及。比自甯波歸。自以師出無功。益愧且懼。乃爲保聚謀。民年十五卽令充軍兵。男子死。妻不得守節。六十無子。收其田產。別給衣食。其意欲如土司爲不侵不叛之夷島。而不知不可得也。土司王朝先從張國柱出海。斌卿利其兵力。以書招之。復使兵詐爲他盜。中路刦之。旣至。又奪其將軍印而拘之。久之。朝先以計脫去。至奉化。聚衆得數千。又阮進亦失權於斌卿。別駐鹿頭。己丑秋。朝先遂約進。并約名振。同攻舟山。魯藩傳諭和解。朝先得諭。卽致斌卿以弛其備。而輕舟襲之。斌卿見兵至。設香案。服公服。手執來諭曰。監國有旨。誰敢者。阮進直前刺殺之。而分其衆。始迎魯王居舟山。辛卯春。名振以小嫌殺朝先。其將張濟。跳城奪哨船。至軍門。陳舟山

虛實。六月。王師進討。名振與阮進奉魯藩分兵出禦。八月。王師渡橫海。突遇阮進舟。進挾火礮升礮投擊。風反自焚。墮於水。王師擒斬之。遂乘大霧直抵螺頭門。名振初不覺。霧霽。見之大驚。卽奉以海南遁。投鄭成功。名振旣去。其弟名揚猶固守舟山。攻之月餘始破。張肯堂在舟山。多樹梨花。作亭其間。顏曰雪支。至是題絕命詩於亭而縊。其前二聯云。虛名廿載著人寰。晚歲空餘學圃閒。難賦歸來如靖節。聊歌正氣學文山。自肯堂外。死者數十人。勝國孤臣。於斯盡矣。名振初至廈門。成功不爲禮。後見其背刺赤心報國四大字。始致謝。延爲上客。癸巳春。使與張煌言入犯。至京口。因讒言撤回。又出犯崇明。屯兵平洋沙。甲午春。再犯京口。舟師抵觀音門。失利而遁。路遇風便。復襲舟山。據之。乙未冬。名振病死。陳六御代統其衆。丙申二月。舟山城哭聲若風箏而咽。其年冬。王師復舟山。斬六御。餘寇悉南徙。朝議以海澨難守。命毀其城。遷其民。而空其地。

日本乞師

日本乞師之議。始於周鶴芝。芝故海盜。往來日本。與撒斯瑪王結爲父子。日本三十六島。島各有主。其國主爲京王。徒擁虛位。權皆掌於大將軍。餘王如諸侯。而撒斯瑪最強。芝既熟日本。橫行海中。已而就撫。爲黃華關把總。值東南喪亂。私遣人至日本。求假一旅以靖難。撒斯瑪王爲言之大將軍。許詔使至。卽爲發兵。芝喜。益市金珠玩好。將以王命往迎。主將黃斌卿謂此吳三桂乞師之續。執不可。芝怒。遂去舟山。久之。或說斌卿曰。北都之變。東南如故。使併東南而失之者。此乞師之害也。今我無可失之地。比之往事。爲不倫矣。斌卿意悟。始使其弟孝卿與馮京第往。會日本有西洋爲天主教者作亂。方嚴逐客之令。京第至長崎島。不得登岸。日於舟中效秦庭之哭。撒斯瑪王聞之。復爲言於大將軍。議發各島罪人。以赴中國之難。留孝卿於長崎。而使京第先還報命。贈洪武錢數十萬。蓋日本不知鼓鑄。專用中國古錢。舟山行洪武錢自此始。長崎多官妓。皆居大宅。每遇月夜。各宅懸琉璃。賽琵琶。豔色奪目。淫聲盈耳。中國所無有也。孝卿居既久。惑之。竟自忘其爲乞師來者。日本薄其爲人。發兵之命。

復寢。其年僧湛微自日本來。爲阮進述請師不允之故。且言其國重佛法。若得普陀山慈聖太后所賜藏經爲贄。師必發矣。進謀之張名振。使阮美以經同湛微往。日本初聞之。京王以下皆大喜。已知舟山有湛微者。則大怒。蓋日本不殺中國僧。有犯止於逐。再往則戮及同舟。湛微初在日本。事南京寺住持應如。後至牋泉島。妄自尊大。惡札村謠。皆署金獅尊者。大將軍見而惡之。逐使過海。梵冊請師之計。特湛微欲借以再往日本耳。阮美知爲所賣。卽載經而歸。自兩使無成。舟山之人。皆追咎斌卿不早聽鶴芝。然日本自寬永以來。承平日久。其人多習詩書。好法帖名畫古器。故老不見兵革之事。本國且忘備。卽令西洋無覺。鶴芝尙存。安能萬里渡海。爲人定亂乎。

兩先生傳

野史氏曰。古來節烈之士。不欲使姓名落人間者。惟明永樂之世獨多。當其時一人殉義。禍延九族。故往往匿跡晦名。以全其宗黨。若申西鼎革之際。朝令不如是之酷也。而以余所聞。或死或遁。不以姓名里居示人者多。有如所傳一壺先生。其補鍋匠

雪菴和尚之流歟。若畫網巾者。自謂一籌莫展。恥以死節節義名。其用心更何如哉。畫網巾者。其姓名爵里。不可得而知也。攜二僕匿邵武山中。爲邏者所得。守將池鳳陽奪其網巾置軍中。先生歎曰。衣冠歷代皆有定制。若網巾則高皇帝所創。我遭國變卽死。詎敢忘祖制乎。每晨起盥櫛畢。必令僕畫網巾於額。乃加冠。而二僕者亦必更相畫也。軍中皆譁笑之。因呼之曰畫網巾。已而王師平諸山砦。鳳陽乃縛而獻之提督。詭稱陣俘以邀功。提督某視其額斑斑然。笑而謂之曰。若爲誰。今降猶可以免。先生曰。我忠不能報國。留姓名則辱國。智未能保家。留姓名則辱家。危不能致命。留姓名則辱身。且我不欲以一死博節義名。軍中呼我爲畫網巾。是卽我名矣。至欲我降。則我舊嘗識王之綱。當就彼決之。之綱者。故高傑部將。時爲福建總兵。卽平諸山砦者也。提督送之福建。之綱見之曰。我不識若也。今將就花求死耳。之綱委曲開諭。且指其髮曰。種種者而不去。何迂也。二僕曰。巾猶不忍去。忍去髮乎。之綱命先斬之。羣卒欲引去。二僕瞑目叱曰。我二人豈畏死者。顧死亦有禮。從容向先生拜辭曰。

奴等得侍掃除於地下矣。皆欣然受刃。之綱又謂先生曰。若豈有所負乎。節義死卽佳。何執之堅也。先生曰。我何負。負君耳。出袖中詩一卷投之地。又出銀一封。謂行刑者曰。此樵川范生所贈也。今與若。遂戮於泰寧之杉津。泰寧謝生葬其骸於杉窩山。題曰畫網巾先生之墓。一壺先生。亦莫知其姓氏爵里。破巾敝衣。徜徉登萊間。尤愛勞山之勝。結茅居之。性嗜酒。每出。必以一壺自隨。人因稱爲一壺先生。卽墨黃生。萊陽李生。心知其非常人也。皆敬事焉。或攜酒就先生。或延先生至家。然先生對此兩人。每瞠目無語。欲有問。輒曰。行酒來。余爲生痛飲。時而酒酣大呼。俯仰天地。若胸中有甚不平者。間一讀書。必欷歔流涕。二生竟莫能測也。先生蹤跡無定。或留久之。乃去。去不知其所至。已而又來。亦不知其所自至。康熙壬子。去卽墨已久。忽而復至。寓一僧舍。素與往來者視之。見其形容憔悴。神情愴怳。問之。俛而不答。夜半必哭。哭或徹旦。數日。竟自縊也。李生云。先生是時年垂七十矣。

談資跋曰。余讀畫網巾先生傳。怪其不死於守將。不死於提督。而獨就之綱求死。觀

兩不相知之語。意別有不言而喻者乎。若一壺先生之蹤跡。則尤奇矣。昔宋中丞牧仲。嘗言西戎間有夫婦傭其家。甚勤力。然每遇主人與客談詩文。輒徘徊竊聽。不能去。積數年。一日忽不知所至。視其室。留書千言。自敘悲憤。詞義博奧。援據今古。出人意表。竟不知爲誰何。余因思易代之際。山巔水涯。樵漁釋道。與夫耕牧傭販中。如一壺先生宋氏傭者多矣。迄於今稗官之筆。遺老之口。猶當流傳未絕。惜乎聞見所限。不獲因其軼事。以想見其人於姓名爵里之外也。

山右二臣

蔡懋德字維立。號雲怡。崑山人。萬歷己未進士。初任杭州推官。執法嚴平。行取入京。授主事。進員外郎。以忤魏黨。乞差歸。崇禎改元。陞副使。視學江右。遷嘉湖兵備。擒大盜屠阿丑。沈千斤。以憂去。服闋。除井陘兵備。復以計擒賊首齊天王。調甯前道。綏內禦外。八城以安。懋德好釋氏學。律身如苦行頭陀。楊嗣昌謂其清修弱質。不宜處邊地。改調濟南。與周遇吉共平大盜李青山。以功陞按察。轉河南布政。時方大旱。斗米

三金賊黨又爭傳迎闖王不納糧之謠。懋德歎曰。此時而急催科。是驅民爲盜也。檄州縣停徵。自劾。鐫七級。俄奉特旨巡撫山西。初至官。卽平土寇。綏潰兵。立干城社。以招智勇之士。日夜爲戰守備。又值京城戒嚴。奉命率標兵防龍固諸關。積勞累以目疾乞休。未得旨。而闖賊已入秦。窺晉矣。懋德聞報歎曰。主憂臣辱。此豈我求去時耶。立起視事。時秦地盡陷。山右所恃。惟一河爲限。而南自芮浦。北至保德。隨處可渡。撫標僅弱卒三千。檄召諸鎮兵。無一人至者。懋德獨立當賊。屢挫其鋒。然亦幸賊大隊未來。故不能遽渡。已而榆林陷沒。岢嵐告急。巡按汪宗友。以晉王手教敦促歸救。懋德不得已。留副將陳尙智。以二千人守河。而引餘兵赴太原。以障其東。懋德甫離河上。而賊大隊抵河津。自船窩東渡。尙智走還平陽。平陽隨破。西河王被害。尙智走保泥山。汪宗友遽奏懋德棄河不守。奉旨解任聽勘。使郭景昌代任。甲申正月。賊轉掠河東。陳尙智叛降於賊。列城皆陷。新撫郭景昌。觀望不前。懋德方召屬官。約盟誓師固守。而罷官命至。或請出城候代。懋德不可。晦日。賊遊騎至太原。傳牌招諭。懋德斬

其人碎其牌。二月五日。自成抵城下。部將牛勇朱孔訓等出戰。死之。六日。自成親督衆攻城。所調陽和兵首降賊。七日。風沙大作。拔木晝晦。部將張雄縋城出降。語其黨曰。城中火器火藥。皆在東南樓。俟我下。卽焚樓。夜中火起。風轉烈。守者皆驚竄。賊遂登城。懋德出遺疏授知縣賈某。謂中軍副總兵應時盛曰。吾學道有年。勘破生死。今日吾致命時也。麾下持之。時盛扶懋德上馬。卽死。疑有闕文且下城巷戰。乃持矛翼懋德突戰。殺賊數十人。至炭市口。賊騎充斥。時盛呼曰。出西門。懋德遽下馬曰。封疆之臣。當死封疆。諸君自去。不可陷我於不義。衆復推之上馬。至水西門。復下馬據地坐。時盛已出城。還顧不見懋德。立殺其妻子。復斫門入告懋德曰。今請與公同死。偕至三立祠。懋德就縊。身輕不絕。時盛脫甲加其肩。而與從騎皆自刎於旁。賊恨懋德不降。親驗其屍。以刀斷頸而去。周遇吉號萃菴。錦州人。勇而善射。性慈仁。得人死力。幼時爲敵所掠。崇禎初。與所娶蒙古婦劉氏自拔來歸。始授把總。積邊功。至京營參將。京營將多勛戚中官子弟。見遇吉質魯。意輕之。遇吉曰。公等皆紈袴子。豈足當大敵。何

不於無事時練膽勇爲異日用。而坐糜廩祿爲同輩皆目笑之。歲丙子都城被兵。從尙書張鳳翼血戰有功。進副將。冬從孫應元勦賊河南。戰光山固始。皆大捷。明年班師。再進秩。己卯秋。復受命勦賊。破安世王於浙川。降其全部。從楊嗣昌扼張獻忠於槐樹關。又扼之化石街草店。賊聞其名。不敢犯。明年與孫應元大破羅汝才於豐邑。又明年與黃得功追破賊於鳳陽。已而旋師。討土寇於壽張。追至東平。連戰擒其魁李青山。屢加太子少保左都督。壬午冬。代許定國爲山西總兵官。開鎮甯武。遇吉在鎮。汰老弱。練勇。繕甲仗。日夜爲戰守備。劉夫人亦雄健。便弓馬。又招胡婦之多力善射者。至三百餘人。擇麾下健兒事之。別爲一隊。平日恣其所欲。必遇戰急。方用以衝堅陷銳。敵甚憚之。癸未。李自成陷全陝。遇吉以沿河千餘里。賊處處可渡。欲分兵扼其上流。而以下流屬之。巡撫蔡懋德。乃請濟師於朝。朝廷遣副將熊通。以二千人來援。甲申正月。遇吉使通防河。會平陽守將已降賊。諷通還鎮。說降遇吉。遇吉大怒。責之曰。爾統兵二千。不能殺賊以報朝廷。反爲賊作說客耶。立斬之。傳首京師。太原

告急。遇吉勒兵往救。賊又使遇吉所親某以書來招。復斬之。進至石嶺關。聞太原已陷。賊先驅將至。卽伏兵忻口截之。殲賊數千而還。聚衆謀曰。逆賊屢勝而驕。我悉精兵據險伺隙。兇鋒可挫。若縱使入險。而嬰城自守。此坐困之道也。僉事王胤懋同知吳鉉疑遇吉欲通賊。固止之。又陰令百姓築土塞門。以沮其行。賊覘官兵不出。喜曰。此天助也。卽自陽方口入。分兵六道趨城。遇吉與麾下楊光隆等分門而守。晝夜苦戰。賊梯則碎其梯。賊穴則燒其穴。城已崩矣。囊土復完。相持三日。殺其驍將四。羣賊死者無算。又設伏城內。出弱卒誘賊入城。急下閘。殺數千人。自成懼欲退。或教以分番迭進。官軍力盡。俄而光隆中礮死。守陴者驚散。東關失守。遇吉督親兵巷戰。往來馳突。賊辟易不敢進。復使騎招之。遇吉曰。退兵十里。我當出。賊許之。乃從角樓縋下。大呼曰。周都督來也。至演武場。自成起揖曰。大同督撫一席。願以累公。遇吉罵曰。瞎賊。我豈受僞官者。今來求一死。光而且明。乘城殺賊。皆我將令。與士民無與耳。賊脇以刃。罵聲愈厲。遂被磔。將士及百姓聞之。益憤痛。人自爲鬪。家自爲戰。四面奮擊。劉

夫人率諸胡婦控弦升屋。矢無虛發。復殺賊無算。血流有聲。遇吉步兵亦略盡。劉夫人矢竭。縱火自焚。諸胡婦及婢僕赴火死。無一人苟免者。王僉事吳同知被執。亦不屈而死。是役也。賊喪精銳數萬。自成歎曰。使守土者更有周都督幾人。我事殆不濟矣。不若且回陝西。相機而動。適姜瓖降表至。自成大喜。俄而宣府總兵王永蔭表亦至。賊遂盡屠甯武遺民而北。

論曰。闖當癸甲之間。所憚者。在秦則孫督師。在晉則周都督。督師不敗。潼關不破。賊不得潼關。敢越河而窺晉乎。都督不死。甯武不陷。甯武全。賊雖得太原。能出三關而犯宣大乎。督師之敗。以朝廷趨戰。全軍一擲。都督之死。以王僉事沮其出戰。坐困孤城。嗚呼。昔人言耕則問奴。織則問婢。閫以外將軍制之。乃一則欲守而不得守。一則欲戰而不得戰。以致金湯失險。干城同殉。國家大事。從茲而去。是誰之咎哉。蔡忠襄之死。與周都督相類。然提三千弱卒。往來奔命於二千五百餘里之間。卽不歸太原。勢必不支。非甯武比。獨汪宗友者。始以羽書招之。旋以不守河劾之。至福王時。猶以

不守河爲失策。賜諡賜祭葬而不予賜廕。尤可歎耳。忠襄旣解任。仍以死殉。視已受命而徘徊河上者何如。若都督之見賊。意在保全百姓。而百姓愈樂爲之死。忠義之感人如是哉。被磔後。材官張某哀其骸而葬之東門之外。至今甯武士民過其地者。莫不爲之流涕焉。諡曰忠武。又奚愧焉。

關西二烈

流賊初擾關中。三原在籍副都御史焦源溥。及涇陽在籍僉事王徵。皆聚衆築堡。繕甲儲糧。以衛桑梓。當是時四方雲擾。賊衆往來颺忽。秦地幾無堅壘。獨二縣之民安居無恐者。兩人力也。已而西安陷。郡縣皆從賊。自成僞行仁義。脇用才望之士。以收人心。先遣兵劫源溥至西安。見其修髯方面。儀觀偉甚。特起加禮。欲重用之。源溥曰。吾縱不能起兵恢復。終不與諸逆俱生。因說自成以逆天不祥。宜翻然改悔。歸命天子。立功自贖。可致封侯。詞氣懇切。賊不忍殺。縱之歸。又遣兵至涇陽。脇徵。徵聞之。引佩刀坐於門曰。賊使至。我必以頸血濺之。子永春跪請曰。大人毋自苦。兒今走西安。

請死以代大人。徵曰：若代吾死，死孝。我誓自死，死忠。各行其志可也。遂絕粒不食。越五日，永春得釋歸。跪進湯餌。徵曰：子之於父，當成其志。卒揮去，不食而歿。邑人私謚曰：端節先生。源溥字涵一，起家進士。崇禎初，官河東兵備。遷甯武參政。再擢右僉都御史，巡撫大同。罷歸。其在河東時，屢與諸將擒殺賊魁，及歸自西安，謀東走蒲州，收召舊旅。又欲奔西甯，結羌戎以圖恢復。而賊關防甚密，終不得去。每憤激歎，形之吟咏。有百二山河尚可全，八千子弟今何在之句。賊聞而惡之，復執之西安。至之日，賊大宴關中縉紳，出秦府金銀器皿分與之。謂曰：餉乏，公等皆墨吏多金，宜各出之以助軍需。且令左右露刃脇之，皆戰慄署諾。惟謹。次至源溥。源溥張髯瞋目，以筆擲自成曰：瞎賊，吾安得金。且汝不聞王嘉胤紫金梁之事乎。我殲渠時，汝始爲賊銼草掃馬矢耳。自成大怒，立磔之。徵字良甫，一字葵心。時有邱東周者，立刺自成，不克而死。而源溥之兄源清字湛一，葵心之友袁養和，亦以拒召絕粒而死。其遁入山者，涇陽則兵備楊國柱，舉人周惇。三原則舉人周昌祚。

秦晉宗人

明太祖二十六子。馬后生者五。長懿文太子。次秦王。次晉王。次成祖。次周王。太祖封成祖於燕。封周王於汴。據元宋舊都。而王二王於西北。秦關百二。晉表山河。豈不屹然。長城萬里。周之魯衛哉。已而二王早薨。成祖入繼。三國嗣王。誼屬猶子。本支百世。與國同休矣。迨崇禎之末。大盜橫行。屠陷城邑。獨周王恭枏出庫金數十萬。募兵扼賊。河決後。薨於彰德。至於秦晉後王。甘心屈辱。兩國宗人。亦皆束手待斃。未聞有以一矢加賊。與天子分憂急難。而抗節死義者。尤不多見也。意者王人之子孫。狃於富貴。故能自振拔者少歟。抑亦靖難之後。前車是鑒。強幹弱枝。積漸之勢。使然歟。西安之陷。秦王降賊。中尉誼杲泣曰。吾不忍見宗國之亡。國主之辱也。我不死。且愧張長史。徐旗官。賦詩三章。自投於井。張長史尙綱。旗官徐應魁也。誼杲之外。不食死者。中尉存樞。自縊者。中尉誼糾之子存柘。於是秦宗室有三烈焉。太原之陷。晉王降賊。宗室死義者六人。府學生員霞。霞父慎鉦。王府審理慎鏤。逸其名者。曰小二。曰長安。又

有敏口者任通判。時在龍門。聞變。知其父必不免。輒爲位。斬衰哭奠畢。望闕再拜。自縊死。餘未有聞焉。而其後賊臣韓文銓。捕晉宗室四百餘人。送西安。悉殺之。叛將陳永福在太原。恐宗人爲變。閉門搜捕。得千餘人。殺之海子堰。若殲羊豕。嗟乎。是真不幸。生帝王家爾。善夫顧甯人之言曰。自古待宗人之失。未有如本朝者。有周用人。必先同姓。漢唐猜忌骨肉。然劉氏李氏之任宰相官中書者。多有矣。獨本朝庸疏舍戚。旣不得筮仕爲吏。又限之國城。若無罪而受拘。故不肖者怙侈放僻。以爲民患。而賢者亦第謹身寡過。安於參養。舉天下之宗。無一人任國家之事。以生草澤之心。而來遠人之侮。卒之幹折枝摧。一時同盡。嗚呼。是亦後王之大戒已。

野史氏曰。明萬歷中宗人之文秀。莫盛於秦。有七子者。善爲詩。崇禎末。六子已逝。而子斗先生。誼糾獨年至八十。後其子存柘殉節。十餘年乃卒。余嘗至西安。猶及見子斗先生。然求所謂青門七子合集。已不可得。而三烈之名。世爭傳之。然則士之所重。固在彼而不在此乎。抑余又聞太原之陷也。中尉長安之母語長安曰。宗室家終難。

與賊並立。毋徒取辱。遂母子同殉。及觀賊臣屠滅晉宗。益嘆死難諸人。非獨節之高也。其揆事尤明且決哉。

獻忠屠蜀

黃虎之窺蜀屢矣。而未嘗得志。至癸未。自成入秦。黃虎獨據湖北。見梁楚殘破。不足久留。乃復溯江西寇。初。夔府設十三隘以捍盜。自劉士奇撫川。患餉不足。漸撤其兵。故賊得乘其無備。士奇在重慶。聞夔州陷。檄參將會英屯涪江扼水路。副將趙榮貴駐梁山扼陸路。而重兵據銅鑼峽以守城。賊先擊走兩路兵。舟師直向峽口。別令騎兵入山徑。襲破江津縣。掠其舟。從上流鼓噪而下。守峽兵立潰。時新撫龍文光方至順慶。將士多往參謁。比返。則賊已奪佛圖關矣。甲申五月。賊陷重慶。士奇及端王皆被執。黃虎降階而迎。謂曰。我兵強於闖。殿下畏闖而去漢中。獨不畏我而去重慶。豈非命乎。將磔之而屠其民。赤日中忽雷電交作。晦冥咫尺不見。黃虎仰而詬曰。我殺人何與天事。用大礮向上叢擊。俄而晴。遂併士奇殺之。百姓但斫右手。有因欲以左

代。而兩手並去者。七月。賊進寇成都。新撫自順慶往救。方出城。順慶卽降賊。賊留殷承祚守之。而令卒僞爲順慶兵。隨文光先入省城。賊至城陷。文光死之。蜀王及妃嬪皆自盡。世子被執。賊封爲太平公。悉驅百姓於中。將縱騎蹂之。天忽尾垂一物如龍尾。黃虎喜。以爲瑞。賊將汪兆齡亦固諫。乃釋去。其年賊建號大西。又自稱秦王。改元義武。置官屬。以嚴錫命爲丞相。分兵掠地。川中郡邑皆從之。黃虎爲人。其性特異。恆醉柔而醒暴。一日不殺。卽悒悒不樂。旣據蜀。先召地方官率鄉紳召見。至則殺之。間有授僞職。不久亦輒見殺。前縣令吳繼善降賊。授僞官。一日爲賊寫祭天文。其紙中接。賊見之。怒曰。若不欲我一統乎。立劓之。降盜江鼎鎮復歸賊。授禮部尙書。後值迎春。黃虎問春入何門。江曰。入東門。賊國號西。聞言東。怫然曰。是何出典。江猶未悟。漫應曰。出大明會典。虎大怒。責一百棍。江有故人爲代受五十。翼日。飛騎收此兩人。并家屬悉斬之。一紳已從賊。爲惡奴所誣。自知不免。乞一言而死。賊笑曰。若何言。欲良死耳。我自有法。仆之地。滾以石軸。立成肉泥。又開科進士一百二十人。狀元張大。

受成都華陽縣人。年未三十。身長七尺餘。弓馬絕倫。羣賊咸賀得士。請圖其像。傳播遠方。賊大喜。賜張甲第一區。美女金帛。家丁二十人。已而黃虎坐朝。僞官奏狀元入見。忽嘖蹙曰。我心實愛渠。但畏見其面。速斬之。須臾。張首至。又傳令將張全家及所賜美女家丁悉處死。禁民間畜馬。及試武生而無馬。則擇營馬極獮劣者給之。俟其既乘。卽令兵士發喊放礮。馬驚人墜。宛轉塵埃。賊撫掌笑樂。畜羣獮。遇朝會。僞官拜伏。輒縱獮下殿。爲所齶者。謂有異志。卽齶以食獮。名曰天殺。嚴錫命爲賊心腹。條陳甚多。嘗言陛下繼嗣不廣。皆由兵間所採女子。不足以配聖德。今有故相陳某女。德才貌俱全。可正坤位。賊於是強委禽焉。忽一日。出示曰。陳娘娘欲齋僧。大僧十兩。小僧六兩。銀用黃封櫃。昇貯大慈寺。諸僧大喜。遠近雲集。市井無賴小兒。多求僧剃髮。暫爲沙彌。得銀許以半謝。至期。入寺領銀者近萬人。賊閉寺門。每十僧貫以一索。引去駢斬之。闖賊敗還。思侵蜀以自廣。屢遣兵攻順慶。黃虎自出禦之。失利。廉得諸生有通表於闖者。由是發怒。命州縣教官率生監來省考試。教官之妻亦率生監之妻。

來省點檢。既至。聚之大慈寺。照牌點名。驅至西城外青羊宮坑之。共一萬七千餘人。所棄筆硯如邱塚。先後所殺紳士。其家屬得生者。皆發娼院。已復并娼優殺之。指官兵爲毛賊。擒得非烹卽副。官吏被擒者。目爲臟胚。叱剝皮。頃刻而盡。全皮俱下。稍與肉粘附。便謂剝不如法。卽縛剝人之人。令善剝者剝之。其虐戾如此。四方郡邑初懼加兵。故賊號令所至。爭先送款。既而不勝其虐。於是王祥起遵義。楊展起健爲。曹勛起黎州。各據地自保。而前大學士王應熊亦聚衆起義。縞素誓師。傳檄討賊。袁韜。武大定等。皆以其兵反正。前守道馬乾德自達州起兵。逐賊將劉廷舉。迎曾英入據重慶。英以書招殷承祚。其使爲邏者所獲。黃虎令斷一手。去一目一耳。割半鼻半脣。給令箭往諭。承祚大懼。卽舉順慶降英。乙酉二月。黃虎使養子劉文秀攻之。爲英所破。僅以身免。賊初志在帝蜀。雖好殺。猶時有所縱舍。及兵出屢敗。列城多叛。謀下荆吳。又憚英爲阻。益憤恨。攘袂瞋目。以咀嚼蜀人爲事。先殺武弁。次及僧道。筮卜醫生。工匠皆盡。尤忌朱姓。知蜀府宗支多在灌縣。圍而屠之。蜀世子亦被害。賊先欲屠保甯。

僧破山爲之請。賊方進犬肉。謂僧曰。噉此卽從汝。破山曰。老僧救百萬生靈。何惜如來一戒。爲啖數鬻。保甯由是得全。至是仍令守將盡屠其民。毀城而還。自入秋以後。悉聚其兵於成都。日遣一將出屠諸郡邑。并及村聚。嘗登高四望。有兵過而炊煙在者。將吏必死。其下爭以多殺爲功。首級重不可舉。男子割勢。婦人各取陰肉。或割乳頭。驗功之所。積成坵阜。又用法移錦江。涸其流。穿數仞。實以精金。及他珍寶。累萬萬。下土石築之。然後決隄放水。名曰銅金。順治三年春。肅王西討。黃虎迎於平陽關。敗還。有曼仙者。本楚府樂戶。被掠。其儕瓊枝。不辱而死。曼仙刻意奉迎。黃虎嬖之。攜入蜀。屢欲圖賊。不得間。及黃虎自平陽敗還。意忽忽不樂。曼仙乃奉毒酒。清歌以侑。黃虎手挽其頸曰。汝先飲此。曼仙不能却。立飲而斃。賊覺其情。念成都百姓必多因敗圖之者。夜寢必數遷其處。又選親信左右千人。號訶事小兒。身易服雜其間。夜出周行街巷。聽人私語。犯忌諱者。以白堊識門。黎明而收者至。偶聞俚語云。張家長。李家短。喜曰。此吾家獨霸之讖也。未幾。卒盡屠之。而益發兵四出。窮搜荒僻。逢人輒殺。如

是者復半載。一日賊獨坐食饅首。忽千萬手自空來奪。又聞樂奏虛室。就視皆無頭女子。未及黃昏。城中鬼語啾啾。賊衆或孤身夜出。鬼輒擊之。賊惡其不祥。出居東園。東園者。蜀外府外園。有梨花數十本。皆二百年物。每歲三月。都人士羣遊其間。賊至卽伐木闢馳道。練兵其處。至是而徙居焉。賊衆之樵採者。反入城拆民房爲薪。八月。賊毀成都。焚蜀府宮殿。及未盡民房。火不能燬者。聚薪發礮。必裂碎之而後已。成都有大小城。相傳張儀所築。劉先主復脩之。蟄以巨石。貫以鐵絙。雄壯甲天下。宮室之盛。擬於京師。一旦變成瓦礫。於是成都四面方千餘里。百物皆盡。空如沙漠。黃虎嘗過梓潼七曲山。自謂文昌子孫。宜王蜀。追尊文昌爲始祖。高皇帝製詩刻石。又自言嘗見天神語之曰。天以百物與人。人無一物與天。因續一句云。鬼神明明自去思。忖。令刻於石。名聖諭碑。有道人諛之曰。陛下卽天神。終當遺棄一切。仍歸上界。黃虎大悅。乃盡殺其妻妾。一子尙幼。亦撲殺之。而謂孫可望曰。我亦一英雄。不可留幼子爲人所擒。汝終爲世子矣。明朝三百年正統。天意未必遽絕。吾死。爾急歸明。毋爲不

義。遂分其兵爲四。屬可望。及李、劉、艾三養子。棄成都北出。九月。賊屠順慶。進屯西充。大治舟楫。將悉殺川兵而入楚。諸將中惟劉進忠收川兵最衆。懼而來降。肅王自保甯。進兵。使大將雅布蘭與進忠輕騎覘賊。直造營門。僅隔一河。黃虎初不爲備。聞兵至。猶以爲他寇。身衣蟒半臂。腰插三矢。引牙將臨河視之。進忠望見指曰。此八大王也。賊方抽矢。雅布蘭直前射之。洞胸墜馬。王師大呼曰。獻賊死矣。急渡河追殺。賊衆以錦褥裹尸。埋於僻處而遁。王師求得。發而斬之。梟其首於成都。厥後埋尸之處。生異草。觸之者輒生大疽。或致死。又有黑虎白晝噬人。人不敢過其地。賊潰兵過重慶。襲殺曾英。旋棄去。王應熊入據之。其明年。王師至。應熊走死。未幾。明宗室朱容藩來寇。王師退屯保甯成都者。亦驅殘民千餘北去。至綿州。復盡殺之。成都之人竟無遺種。已而朝議以四川荒索。饋餉難繼。并撤保甯順慶之兵。明桂王乃使楊喬然爲巡撫。大學士呂大器爲總督。統馭諸將。代王應熊。時兵荒累年。百姓存者百無一二。或久竄山谷。變爲野人。舉體生毛。能手格猛獸。擘獐鹿啖之。懸崖絕壁。騰上若鳥隼。所

在蒿萊滿目。狼虎成羣。有張懋賞者。主僕八人。至榮昌蒞任。入城四顧無人。日未暮。羣虎突出。八人之中。攫食其五焉。

川中諸將

王師既撤。明川中諸將各分地自守。雅川曹勛。嘉定楊展。遵義王祥。重慶袁韜。涪江雲陽。則曾英。養子李占春。及于大海。其餘趙榮貴。朱化龍。侯天錫。馬應試。分屯龍安。茂州永甯。蘆衛等處。巫山。萬縣。則譚誼兄弟據焉。而朱容藩既挫王師。還屯夔州。兵最強。呂大器徒擁空名。不能制也。已而容藩謀據蜀。自王先改忠州爲大定府。順治五年夏。遂自稱吳王。鑄侯將軍等印。徧給在川文武。罕有應者。獨于大海往。僞封靖南侯。降賊舊官張京。責其貢獻。大海唯唯。比入謁。高唱進寶。僞鴻臚問曰。何寶。大海徐答曰。奇貨駱駝。蓋容藩面瘦曲背。故以相諛也。楊喬然與呂大器乘衆心不服。檄諸將共誅滅之。未幾。大器病亡。卽以楊喬然爲總督。楊展在嘉定。據有川西南州縣。又能識寶藏氣。所至得窖金。荒亂中用以賑濟。故袁韜及李乾德。武大定。皆歸之。後

與王祥構禍相攻。馬侯二師皆助祥。展使其子破蘆衛。殺馬應試。進攻天錫於永甯。王祥來救。展兵大敗。由是威名日損。又性驕矜。衆漸不悅。韜等遂襲殺展而分其地。王祥者。王應熊部將。頗矜名節。歲必通使廣西貢獻。其妻尙祖。警敏有權略。選健婦數千。皆男扮。別爲一隊。七年。祥爲孫可望所破。自刎死。尙祖更衣盛妝。南向叩頭。又拜其夫死處。旣投纆。猶以手招左右曰。扣寬不得絕。可緊之。如其言而盡。可望旣克遵義。進攻嘉定。李乾德死之。袁韜武大定。皆迎降。曹勛亦棄雅州。與化龍。天錫。俱西走。不知所終。李于二師久屯涪雲。可望屢使招之。兩人怒曰。彼殺我父。幽我君。而我從之。不忠不孝。與禽獸何異。立斬其使。及賊兵至。占春力戰七日不能支。與大海率流民走楚。中路食盡。流民咸怨。占春不勝憤激。中夜呼酒。對妻子痛飲爲別。單騎遁入華山爲道士。大海以其衆歸朝廷。九年。王師破保甯。斬趙榮貴。十五年。復重慶。喬然伏毒死。其年秋。王師南討譚誼。乘虛攻順慶。不能克。未幾。誼及其弟弘殺譚文來降。有明故臣遺寇始盡。四川遂平。

沙定洲之亂

沙定洲。臨安王弄土司也。其父沙源。驍勇有將略。數從征討有功。時號沙兵。王弄與阿迷州接壤。其土官普民升者。定洲內親也。民升嬖江右范姓。妓名綵雲。生一子名服遠。范氏狡而勇。崇禎間。挾制民升。導之攻劫。遠近苦之。已而民升死。范氏獨據阿迷。年長矣。一日突至。王弄却定洲曰。惟爾可與我爲夫婦。定洲以有妻告。范曰。呼來。我自語之。定洲妻至。范輒揮刀斷其首。顧定洲曰。今不可以生同室死同穴乎。遂夫之。定洲之年與服遠相若也。復嬖范氏。用爲謀主。范氏先教定洲告訐諸土司。以兵掠之。沐天波不能制。國變後。謂定洲曰。是可取而代也。使誘武定土司。吾必魁作亂。欲俟天波來調兵。因以伺間襲省城。定洲從其計。必魁果借行鹽加稅爲名。興兵破楚雄。聲言已無朱皇帝。安有沐國公。天波發兵討之。檄蒙自二千。定洲以五千往。至雲南。則必魁已就擒。定洲失望。時有于錫朋者。用事沐府中。所爲多不法。沐氏家奴懷怨者。聞定洲有陰謀。許爲內應。定洲乃託言入辭。乘不備。夫婦拔刀升堂。格殺數

十人。諸奴應於內。沙兵集於外。天波踉蹌走楚雄。女妻及二弟皆被殺。天波既遁。范氏又教定洲劫巡撫吳兆元。使其題言天波反。定洲討平之。宜以代鎮雲南。兆元不可。則拘而奪其印。又詭草祿豐在籍尙書王錫袞上永明王口。執錫袞至。以稿示之。錫袞大恨。懇上帝祈死。越數日竟卒。定洲於是遂行府事。發兵攻楚雄。天波再走永昌。沐氏世鎮雲南。府藏盈積。佛頂石、青箭頭、丹砂、落紅、琥珀、馬蹄、赤金、皆裝以篋。篋皆百斤。藏以高版。板庫五十。篋共二百五十餘庫。他珍寶不可勝計。定洲運入本峒。累月不絕。當是時孫可望等休兵貴陽。方圖雲南。聞之駭曰。此皆我囊中物也。起兵兼程而進。丁亥四月。四養子兵入雲南。稱黔國焦夫人弟來復仇。所過城邑有不下者。輒攻屠之。定洲方攻楚雄。聞之斂兵而還。李定國邀擊之於蛇花口。定洲大敗。遁還阿迷。不敢出。可望等至省城。兆元迎之入。執諸叛奴戮之。進徇迤西諸郡。得楊畏知。使作書招天波。天波使其子忠顯至軍。覘可望意。可望厚禮之。發二十騎送之歸。而潛兵隨其後。先奪瀾滄橋。忠顯歸見其父。二十騎中有兩人歷階而上。忠顯視之。

驚曰。此李劉二將軍也。遂劫天波還雲南。車裂于錫朋以謝國人。己丑夏。李定國征阿迷。憚其險。已還師。定洲聞兵退。與范氏出過其妹壻湯嘉兵砦。定國覘知。還兵襲之。執其夫婦。李兵初聞范氏嬖於二夫。疑必辰羸夏姬之流。及獻俘。魁墨奇醜。無不大笑。械至雲南。夫婦竟同磔於市。

老神仙

張獻忠掠河南。俘一男子。自言有禁方能活人。賊姑置軍中。未之信也。獻忠性殘暴。每以大槌撻左右至死。既死而悔。偶憶男子言。使治果立愈。始寵異焉。獻忠在長沙。一日忽下令曰。人持一几來。頃之得几數萬。累爲臺。高幾千尺。令將士執弓矢環其下。曰。吾有呼。卽全軍皆呼。而召男子登之。男子登未半。股慄欲止。視臺下皆引滿相擬。大懼。遂造於巔。於是獻忠揖而呼曰。老神仙。將士數十萬齊聲曰。老神仙。老神仙。聲殷然動山谷。自此軍中皆稱爲老神仙云。老神仙者。鄧州人。姓陳名士慶。少慕神仙術。遍遊名山無所遇。後至終南。見老人籙冠羽衣。瞑坐石上峒中。士慶疑非常人。

再拜自陳。求爲弟子。久之。老人拭目徐視曰。若豈神仙中人。去。毋溷我。士慶跪拜者累日。每飢則往山下乞食。老人乃與一物如飴。食之。腹中氣蒸蒸然。遂不復飢。士慶愈不肯去。又累日。老人出書一卷授之。始拜受而退。視其書多不省。唯末四頁頗能識之。則禁方也。歸過洛陽。有富家女秋千墜地而折足。募能愈之者。予百金。試以其方治之。果愈。得金以歸。時盜賊蠡起。父母疑子素無賴。在外久。必從賊得金。士慶出書自明。父方怒。投之火。急起拾取。止存末四紙而已。士慶初匿其姓名。後蜀文士劉涪與之善。許爲作傳。始爲涪述之如此。其在賊中所全活甚衆。獻忠嬖楚府宮人老脚。偶以暴怒。引刀刺之。洞腹潰腸。召士慶使治。士慶曰。嘻。烏有人腸離體而可復活者。然大王有命。不敢違。昇置木屝。以清水滌之。納其腸胃。線紉而傅以藥。老脚越宿而呻吟。三日而思飲食。五日而起坐。不十日而仍侍左右矣。孫可望殺一愛妾。士慶又其必悔。卽持去治之。如老脚。衾裹置車中。閱數日。見可望曰。前夜將軍何自殺所愛乎。可望撫膺嘆曰。悔不求君治。士慶曰。母過傷。吾今適得一美人。願以奉將軍。令

人持車至。啟衾出之。則前所殺妾也。視其項。紅痕環如縷。美麗乃倍於平時。白文選與官軍戰。礮中其頸。瀕死。士慶曰。傷重矣。我無子。彼能父我而養我。以終身。當活之。然彼素反覆。書券來。白卽書契券如其言。乃以藥殭其痛處。鋸去傷骨。殺犬取脰骨。如其長合之。敷以藥。閱三日。而文選馳騎入官軍。斬發礮者。以首歸。其奇驗多類此。獻忠死。士慶遨遊諸將間。年老矣。猶日飲酒數斗。御數女人。或求其術。輒曰。此非吾所能傳。有司之者。後卒從文選投誠。而病死於騰越。

論曰。余覽世所傳老神仙事。洵奇怪。古方技中不多見也。惜爲賊用。弗以其術活一忠義士。旣又聞降將王安言。在賊中嘗從老神仙求藥。見其從羣婦人剗取陰上肉。方寸許。雜以藥。投爐中熬之。須臾火起。光滿一室。其火著物不燃。久之。老神仙曰。藥成矣。復投以藥而火熄。若然。是其術非作賊者不忍試。且無由試也。曷足尙哉。

